



5. marts 2012

UPA 2012/133

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Kapisilittatta qanoq ililluni nunatsinni niuernikkut pitsaanerpaamik atorluarneqarsinnaaneri pillugit apeqquteqaat aallaavigalugu oqallinnissamik siunnersuut.
(Inatsisartunut ilaasortaq Karl Lyberth, Siumut)

Tunngavilersuut:

Nunat tamalaat akornanni NASCO-mi (North Atlantic Salmon Conservation Organization) isumaqatigiissut 2009-mit 2011-ip tungaanut atuuttoq naapertorlugu kalaallit kapisilittaat taamaallaat nunatsinni atugassatut nioqqutissiarineqarsinnaapput. Kapisillittaaq niuerneq aqutugalugu avammut tunineqannginnissaat isumaqatigiisummi aamma allaqqavoq. Taamaalilluni kapisilittarineqartut Kalaallit Nunaanni atugassatut nioqqutigineqartillugit pisat niuernikkut atorluarsinnaanerannut inerteqqummik isumaqatigiisummi pineqartumi allassimasoqanngilaq.

Kapisilinniarneq pillugu Namminersornerullutik Oqartussat nalunaarutaat nr. 21, 10. august 2002-imeersumi § 5, imm. 1 naapertorlugu pisassiissutigineqartut ingerlatsivinnut pisiortortunut tunineqarsinnaanerat periarfissaqartinneqarpoq. Naak nalunaarummi erseqqissumik allassimasoqanngikkaluartoq Naalakkersuisut oqarnerat naapertorlugu aalajangersagaq taanna avammut nioqquteqarneq siunertaralugu kapisilinniarnermut attuumassuteqarpoq. Taamaalilluni nunatsinni atugassanik nioqqutissiornerissaq taamaallaat siunertaralugu tunisassiorfinnut tunisisinnaaneq killiliivigineqanngilaq. Naalakkersuisut nittartakkami quppernerminni ulloq 18. juli 2011-mi nalunaarutaat naapertorlugu inuussutissarsiutigalugu aalisartut piffinni kalaalimineerniarfinni piffimmilu suliffeqarfinnut, soorlu napparsimavinnut, hotelinut neriniartarfinnut assigisaannullu taamaallaat tunisisinnaapput, tunisassiorfinnuunngitsorli. Kalaallit Nunaanni inuussutissarsiornermik ingerlatsisuni attaveqartarnikkut, tassunga ilanngullugit niuertunut aalisakkerinermillu inuussutissarsiortunut, maleruagassat atuuttut nalornissutigineqartut paasivara.

Maani nunatsinni kapisilinnit nioqqutissianik assigiinngitsumik igaannariangorlugit piariikkanik pujukkanilluunniit nunani allani nioqqutissiarineqartunik assersuutigalugu Pisiffimmi, Pilersuisumi Brugsenimilu pisisinnaavugut. Nunap nammineeirluni pisuussutai nunami tassani ulluinnarni atugassanut pisiniarfinni pisiarineqarsinnaanissai pissusissamisoorpoq. Nammineq kapisiliutitta mamarnerunerat kisiat patsisiginagu, taamaattorli nammineq pisuussutitta nunanit allanit eqqussuinnarnata atorluarnissaat eqqarsaatigisariaqaratsigu. Nunami maani aalisartut tunisassiorfullu pisuussutinik taakkunanga aningaasanik iluanaaruteqarnissaat soorunami aamma siunertaavoq. Tunisassiorfinnut tunineqartussanik immikkut pisassiisinnaaneq periarfissat ilagaat.

Ullumikkut nunatsinni namminermi atugassatut kapisilinnik amerlassusilernagit piffissamik killiliilluni aalisartitsisoqartarpoq. Tunisassiortut niuertullu kalaallit kapisiliinik pisiortornissartik, tunisassiornissartik kiisalu tuniniaanissartik soqutigigaat paasivara. Qanoq ililluta tulluarnepaamik kapisilinnik inuussutissarsiornikkut iluaquteqarnissamut sinaakkusiisinnaanerput pillugu Naalakkersuisut saqqummiussinissaat kaammattuutigiumavara; ullumikkut maleruagassat suut atuuppat, qanorlu iliorluta kapisillit inuussutissarsiornikkut annertunerusumik atorluarneqarsinnaanerat siunertaralugu allanngortissinnaavavut, imaluunniit inuussutissarsiornermik ingerlatsisut maleruagassanik sunik imminerminnut tunngatillugu atuuttoqarneranik ersarinnerusumik paasinninnissaat qanoq ililluta angusinnaavarput.

Qanoq iliornikkut nunatsinni kapisilittatta nunatsinni nioqqutigalugit pitsaanerpaamik iluaqutigisinnaanerivut pillugit Inatsisartuni partiit allat kiisalu Naalakkersuisut isumaat tusarusuppara; atagu nunatsinni inuussutissarsiortut kapisilinnik niuernikkut pitsaanerusumik iluaquteqarsinnaanerat pillugu oqallisiginnitta.